




朔方備乘

准噶尔山藩平定略
烏梁海内属定略
哈萨克内属定略
吐微呈度考

ル 5
103
4





呂
103
分



朔方備乘卷第四

支那
所

聖武述略四

準噶爾蕩平述略敘

臣秋濤謹案準噶爾舊為西北強部其境與俄

羅斯接壤其勢亦與俄羅斯埒大昔康熙間克

魯倫河之役地近東方故悉發東三省兵令黑

龍江將軍薩布素統之自是戰於烏爾會捷於

昭莫多地皆在杭愛以東既而窺青海寇西藏

則邊警之來又在洮岷以西蓋沙磧之地號為

朔方備乘

卷四

準噶爾蕩平述略敘

瀚海準部恃勢憑陵出沒靡定卽俄羅斯亦深
憚之異域錄云俄羅斯東境城邑如塔喇斯科
等處與策妄阿拉布坦相鄰每被侵擾足知準
部剽劫之習犯天下之公怒也我

朝統一寰宇薄海內外罔弗臣服惟準部跳梁西
陲勞

三朝廟算始克平之世咸知乾隆中取新疆闢地二萬
餘里按準回二部東西六千餘里南北三千餘
里以徑一圍三計之得周二萬餘里然康熙中

因準部攻喀爾喀

聖祖撫而收之計喀部東西五千餘里南北三千餘里
其周已逾二萬里矣迨準部寇西藏

聖祖發兵逐之收其地入版圖計藏地東西南北各五
六千里其周又逾二萬里矣雍正中青海羅卜
藏丹津蓄叛謀

世宗命將收其地東至甘肅西至藏地三千餘里北至
沙州南至中甸五千餘里其周又逾二萬里矣
因此三地悉入疆索而西北萬里外之俄羅斯

業已講信修睦永相和好然後

高宗西伐成功於指顧之間卽阿逆叛逃終爲羅刹執

獻蓋外域之服

教畏

神非一日矣說者謂西北數萬里之版章

聖祖樹之

世宗培之

高宗穫之蓋惟有

善繼善述之美而後

文謨

武烈益顯著於天下固億萬世

聖子神孫所當永遠效法者已

準噶爾蕩平述略

準噶爾者厄魯特四部之一其先本元阿魯台
部聲譌爲厄魯特後分爲四日和碩特曰準噶
爾曰杜爾伯特曰土爾扈特其游牧在金山之
西各有分地以伊犁爲會宗處東鄰喀爾喀北
鄰俄羅斯準噶爾兵力強於諸部

國初時其會嘗遣使通貢後有噶爾丹者

臣秋濤謹案一

作噶爾旦一作額諾德

自立為汗性兇狡攻滅和碩特鄂

齊爾圖汗并其地遂侵掠其鄰喀爾喀部喀爾

喀地在我四十九旗蒙古之北與準噶爾接壤

至是為所侵擾勢不支康熙二十七年喀爾喀

之土謝圖汗車臣汗等率全部來歸並不敢游

牧於故地避入我邊境

聖祖敕噶爾丹率眾西歸還喀爾喀侵地噶爾丹既屢

勝益驕蹇遂據喀爾喀庭幕四出攻剽二十九

京

年五月俄羅斯使人吉里古里伊法尼齊等至

詔諭之曰噶爾丹揚言會爾國兵同侵喀爾喀喀爾喀

已歸順本朝儻誤信其言是負信誓而開兵端也爾

等可疾遣善馳者二人歸告尼布潮頭目令伊徧諭

俄羅斯之眾當是時噶爾丹以追喀爾喀為名選銳

東犯侵及烏爾會河尙書阿爾尼率兵備邊會

厄魯特驅掠喀爾喀人畜過阿爾尼以蒙古兵

擊之而令喀爾喀奪還所掠喀爾喀務爭取陣

遂亂厄魯特因而乘之反爲所敗乃以裕親王福全爲撫遠大將軍恭親王常寧爲安北大將軍出師至烏蘭布通大敗其衆噶爾丹始以書來乞和然弗悛也其兄子策旺阿拉布坦亦爲所凌虐嘗遣間使來附我使者往爲厄魯特所害三十三年約其來會盟不報而擾喀爾喀益甚

聖祖仁皇帝念喀爾喀爲我外藩不庇之使安游牧勢將以近邊蒙古地處之則蒙古生計亦受害自

非大創噶爾丹不可乃決計用兵又恐我兵至而敵先遁也三十四年圖謝圖親王沙津來覲于木蘭具言噶爾丹約其爲內應將入邊

聖祖仁皇帝命沙津僞與相結誘其兵來是秋噶爾丹果掠喀爾喀之納木扎爾陀音所部駐兵於土喇及克魯倫河之間自秋徂冬不去亦不犯漠南遣使往激之賊令使者徒步歸且大言借俄羅斯烏鎗兵六萬將大舉內犯蓋以烏蘭布通之役火器不如中國而敗故佯假西洋火器以

張其軍其實俄羅斯並無意助寇且噶爾丹懲前敗亦未敢深入也三十五年春三路出師

聖駕統禁旅由中路出獨石口向克魯倫河進發黑龍江將軍薩布素率東三省兵出東路遏其衝撫遠大將軍伯費揚古率將軍孫思克總兵康調元等出西路向土喇進發五月五日大兵至克魯倫河噶爾丹已遁追之不及

聖駕回鑾費揚古兵至昭莫多探知噶爾丹在特勒克濟相距僅二十里遣碩岱誘之孫思克陣東阜

康調元陣西阜以待賊果大至我軍擊之自未至西噶爾丹大敗追殺三十餘里斬數千級生擒數百人牛二萬餘羊四萬餘軍資器械無算噶爾丹之妻阿奴哈屯亦死於亂軍其他台吉宰桑陣歿者不可數計投費揚古軍者二千餘人投馬思喀軍者五百餘人噶爾丹既敗與台吉會於塔米爾噶爾丹欲往翁金丹濟喇欲往阿爾台阿賴卜灘臣秋濤謹案一作阿拉布坦及丹津俄木布欲往俄羅斯邊境皆無定議已而丹津俄木

布之人盜噶爾丹部內羊馬噶爾丹責之遂有隙丹津俄木布叛去惟丹濟喇及阿賴卜灘尙隨之又有諾顏格隆及吳爾占扎卜等亦率其屬以從然所屬各不過千人少僅數百人

聖祖仁皇帝欲乘勢遂滅之秋九月

聖駕再發京師往歸化城經理其事檄諭青海諸台吉協擒噶爾丹論策妄阿拉布坦亦如之又多遣間使招其黨與時翁金有我軍所餘糧噶爾丹欲資以度冬使丹濟喇來劫我副都統祖良璧

敗之其遣往達賴喇嘛之使人喇克巴過青海亦爲我副都統阿南達所擒有台吉厄爾克巴圖等皆承檄與策妄阿拉布坦會於阿爾台約共擒噶爾丹噶爾丹聞之遂向白格爾西去十二月

聖駕回京三十六年春噶爾丹之子塞卜騰巴爾珠爾捕獸於巴爾思庫爾我哈密回目都拉達爾罕遣子郭帕擊擒之俘送京師二月

聖駕啟鑾往甯夏時噶爾丹竄於薩克薩呼里克資野

獸以給勢益蹙諸台吉咸出怨言噶爾丹於三月十三日仰藥死丹濟喇攜其屍及其女鍾濟海來降

聖祖仁皇帝以噶爾丹餘衆畀策妄阿拉布坦無何狼子野心漸狂悖五十四年來擾哈密我駐防哈密之遊擊潘至善拒之肅州總兵路振聲出兵應援敵始去自是常發兵備邊五十六年以內大臣傅爾丹爲振武將軍駐阿爾台尙書富寧安爲靖逆將軍駐巴里坤散秩大臣祁里德爲

協理將軍在西路策應是年冬策妄阿拉布坦遣大策零敦多卜侵西藏藏中酋長曰拉藏汗與達賴喇嘛及班禪厄爾得尼退守布達賴五十七年侍衛色楞率西寧兵會同青海王台吉等進援總督額倫特繼之未至而拉藏汗已爲敵所殺額倫特敗賊於齊諾郭勒色楞敗賊於喀喇烏蘇尋合兵進勦八月朔日賊大至額倫特中槍殞我師敗績於是撫遠大將軍允禴率重兵駐西寧五十八年平逆將軍延信由青海

定西將軍噶爾弼由打箭爐兩路進兵收復藏地傅爾丹富寧安祁里德等亦由西北兩路襲擊以分賊勢富寧安在僻展降回衆三百餘至吐魯番降番衆千餘祁里德亦降厄魯特宰桑塞卜騰等二千餘傅爾丹至格爾額爾格殺厄魯特二百餘擒宰桑貝肯等百餘然皆未深入也八月延信兵與大策零敦多卜戰於密諾郭勒綽瑪喇等處皆捷噶爾弼由南路乘虛入聞春丕宰桑以兵來拒及其未至先克墨朱工喀

所至望風歸款朱貢之胡土克圖獻地降第巴達克咱及喇嘛鍾科爾亦降卽令聚皮船渡河乘勢直抵西藏藏中大小頭目及各寺喇嘛俱歡迎恐後盡擒獻準噶爾喇嘛百餘人其大策零敦多卜所授爲總管者俱斬於軍前西藏遂復雍正元年青海王羅卜藏丹津叛以陝督年羹堯爲撫遠大將軍提督岳鍾琪爲奮威將軍入平之羅卜藏丹津走投策妄阿拉布坦

世宗憲皇帝遣使索之不卽獻惟不敢入犯乃撤兩路

兵量留兵哈密護其耕作五年策妄阿拉布坦
死子噶爾丹策零襲凶狡好亂過於其父又集
兵窺邊乃復以傅爾丹爲靖遠大將軍駐阿爾
台岳鍾琪爲寧遠大將軍駐巴里坤噶爾丹策
零遣小策零敦多卜以二萬衆犯闊舍圖掠駝
馬總兵樊延副將冶大雄拒退之九年六月傅
爾丹出師敗績於和通淖爾兵二萬得歸者僅
二千餘岳鍾琪聞傅爾丹被圍急出師遙爲聲
援亦不能大獲賊得志益猖獗大策零敦多卜

駐華額爾齊斯小策零敦多卜駐喀喇額爾齊
斯日伺釁擾邊時方築城於科布多以地遠難
守移營於察罕瘦爾以順承親王錫保爲靖邊
大將軍鎮之降傅爾丹仍爲振武將軍又以馬
爾賽爲綏遠將軍駐歸化城爲犄角兩策零敦
多卜一由郭多里一由杭愛來掠喀爾喀公通
靡克兩佐領人畜爲所擄通摩克率所部內移
小策零敦多卜自率大衆屯蘇克勒達錫保令
喀爾喀親王丹津多爾濟及額駙策凌與戰於

鄂登楚克敗之時議以推河翁金河拜達里克
 河三處皆要地乃各築城為大營犄角馬爾賽
 率兵移守拜達里克城以扼山南之衝十年又
 有塞卜騰策零那木扎爾由烏魯木齊來擾哈
 密岳鍾琪遣總兵曹勳副將紀成斌拒之秋噶
 爾丹策零傾國入寇至額駙策凌所部策凌方
 入朝遂盡掠其貲畜二子一妾亦為所得策凌
 在途聞之割辮髮及所騎馬尾誓以死復讐即
 借各蒙古兵回救噶爾丹策零方酣飲為樂策

凌夜半由間道繞出山後黎明自山頂大呼壓
 而下賊驚起人不及甲馬不及鞍棄其軍貲碎
 遁策凌追及之於額爾德尼招左阻山右限大
 水賊無路走我兵乘勢蹙之擊殺數萬尸滿山
 谷河水數十里皆赤噶爾丹策零由鄂爾昆竄
 去策凌即檄馬爾賽出拜達里克城截殺臣秋
案趙翼謂策凌急檄馬爾賽出歸化城邀擊魏
源曰考方略馬爾賽是時已不在歸化況此戰
在漠北歸化城在漠南相去二千餘里賊敗必
西走何由轉繞大漠東南為歸路乎松筠新疆
識略俞正燮癸巳類 副將軍達爾濟整兵待發
稿並沿其誤故辨之

馬爾賽不許副都統傅鼐至跪求出兵亦不許
軍士登城望見賊騎由城下過如亂鴉投林紛
雜無行列翌日將士不稟命自出追之噶爾丹
策零已從前隊過僅截其零騎馬爾賽由是伏
法而噶爾丹策零衰弱亦不敢擾邊等遣人來
議和十二年傅鼐及學士阿克敦報之等以所
議邊界不決使命往返至乾隆四年始定議厄
魯特游牧不得過阿爾台喀爾喀游牧不得過
札卜堪兩國各遵守已又許其通市易及進藏

作佛事人馬貨物各限以數乃盡撤西北兩路
兵十年噶爾丹策零死其子策妄多爾濟那木
扎爾嗣位昏暴不恤國事十五年其姊夫賽音
伯勒克弒之立其庶兄喇嘛達爾濟本噶爾丹
策零外婦所生子也有大策零敦多卜之孫達
瓦齊於喇嘛達爾濟爲近屬喇嘛達爾濟忌之
輝特台吉阿睦爾撒納者最狡黠欲構達瓦齊
篡亂而已從後圖之乃與達瓦齊合兵突入伊
犁弒喇嘛達爾濟達瓦齊自立爲汗阿睦爾撒

納欲襲之而力不敵十九年遂與都爾伯特台吉訥默庫和碩特台吉班珠爾率所部二萬餘人來降且乞師往靖亂其意欲借我兵力滅達瓦齊而已得據其處也先是喇嘛達爾濟之立以台吉達什達瓦素爲策妄多爾濟那木扎爾所任用執而廢之欲以其部衆分賞各台吉其部有宰桑薩拉爾不肯他屬率千戶來降

高宗純皇帝授爲散秩大臣詢以準夷事備悉其內亂狀然尙未欲用兵也迨達瓦齊之篡有都爾伯

特台吉策凌

臣秋濤謹案一作車凌下同

及策凌烏巴什策

凌蒙克率所部來降益得悉其情形亡可企足待

高宗純皇帝念我朝數十年設斥堠議邊防厲兵秣馬欲殄滅準噶爾而未能者今事會適有可乘時不可失於是用兵之策遂決方調兵籌餉以圖大舉而阿睦爾撒納來降尙書舒赫德奉

命往撫率請留其壯丁於烏里雅蘇台軍營而部落悉徙蘇尼特斥罷之更以尙書班第往輯其衆俾

游牧於札卜堪阿睦爾撒納等至熱河封爲親
訥默庫班珠爾皆封郡王寵賚甚至二十年春
兩路出師北路以班第爲定北將軍阿睦爾撒
納爲定邊左副將軍副之西路以陝甘總督永
常爲定西將軍薩拉爾爲定邊右副將軍副之
所至準夷各部落大者數千戶小者數百戶攜
酮酪獻羊馬跪迎恐後兩路兵行數千里無一
人抗顏行者五月五日齊抵伊犁達瓦齊已遁
於格登山阻淖爲營衆尙萬餘我兵追及之侍

衛阿玉錫等夜以二十二騎直薄其營呼噪突
入賊萬衆驚潰達瓦齊竄於呼爾滿回酋霍集
斯承檄縛獻軍門並獲青海叛賊羅卜藏丹津
及前歲已降復叛之巴朗先後檻送入京行獻
俘禮是役也出師僅百餘日不傷一兵不折一
矢犁庭掃穴生縛名王沙漠萬里悉入版宇信
自古未有之駿烈也厄魯特之先故有四衛拉
特華言四大部也部各有汗

高宗純皇帝之初用兵也欲俟平定後仍其舊設四汗

衆建以分其勢可以消亂萌息邊釁如喀爾喀之編七旗至今長享太平而阿睦爾撒納志不在此也

高宗純皇帝預燭其情甫出兵卽密諭班第示以分封四汗之意以消其妄念又以額駙色布騰巴爾珠爾本科爾沁親王與阿睦爾撒納語言相通氣類相近令與阿睦爾撒納偕行俾耦居無猜實陰伺察之乃額駙反與之昵阿睦爾撒納遂恃爲奧援旣平伊犁班第及西路參贊大臣鄂

容安留伊犁與阿睦爾撒納薩拉爾共籌善後事宜阿睦爾撒納輒隱以汗自處事多不稟承將軍生殺任意置副將軍印不用用其國汗舊傳小紅鈐記發書鄰部哈薩克及俄羅斯之烏梁海又使其黨布流言謂不立阿睦爾撒納爲汗準部終不得安班第鄂容安密以其事馳奏得

旨卽軍中誅之毋濡忍貽後患而是時大兵已撤隨將軍者僅五百兵其餘皆厄魯特也班第等遂不

敢舉事時先有

旨令阿睦爾撒納以九月至熱河行飲至禮班第等乃趣其入覲欲使入我境則易擒也先是六月中額駙先回阿睦爾撒納私以總統四部之意乞其代奏並約略時日以七月下旬爲期及額駙歸不敢奏而阿睦爾撒納待信不至以入覲期迫班第又令喀爾喀親王額林沁多爾濟伴行阿睦爾撒納不得已自伊犁起行途次屢遷延迨八月中旬尙無信疑事中變十九日行至烏

隆古距其舊游牧僅一日程詭稱歸辦裝以副將軍印付額林沁多爾濟使先行約一二日即追及遂率所部逃去額林沁多爾濟久之始悟其給已急追之已不及阿睦爾撒納寄聲伊犁衆厄魯特嗾其反又使其黨阿巴噶斯哈丹等掠西路軍台先已潛遣人迎其妻子及部衆於札卜堪賴先事已奉

聖諭烏里雅蘇台軍營得爲備其妻子遂不能去而伊犁宰桑克什木敦多卜曼集等蠶起爲亂二十

三日班第鄂容安薩拉爾率五百兵奪路歸賊
萬眾圍之至崆吉斯薩拉爾先遁五百兵皆散
班第鄂容安自刎死定西將軍永常方駐木壘
聞軍台被掠六七處恐賊大至乃退回巴里坤
時新降諸台吉方覲於熱河噶爾藏多爾濟封
為綽羅斯汗沙克都爾滿津封為和碩特汗巴
雅爾封為輝特汗其先降之策凌已封親王至
是亦封為都爾伯特汗其餘宰桑呢嗎丹津巴
桑厄魯錐音哈薩克錫拉等各授官賞銀幣皆

願歸出兵協勦阿睦爾撒納

高宗純皇帝以額駙匿情不奏致誤軍事革其爵發軍
前効力額林沁多爾濟與阿睦爾撒納偕行而
聽其免脫立賜之死又以永常懼怯退兵逮問
來京以公策楞為定西將軍富德玉保達爾黨
阿俱為參贊大臣由巴里坤速進兵十一月師
行玉保為前隊諸降夷入覲後回游牧者亦各
以兵從二十一年正月薩拉爾自伊犁脫歸迎
大軍於吐魯番玉保至特克勒探知阿睦爾撒

納僅距一日程急進可追及忽有報台吉諾爾布已擒阿睦爾撒納來獻者玉保遂駐兵待之先以紅旗報捷於策楞策楞亦不暇審虛實卽以紅旗報入

京而不知報擒阿睦爾撒納者卽阿睦爾撒納所遣慮我兵追及故以此緩師而已得逸去也二月策楞兵至伊犁阿睦爾撒納已逃入哈薩克乃褫策楞玉保職用達爾黨阿爲定西將軍富德副之以擒阿睦爾撒納事專任此二人直入

哈薩克索取繼

命巴里坤辦事大臣兆惠爲定邊左副將軍往軍營應援諸降夷在軍前者皆撤歸使得休息夏六月

忽有喀爾喀郡王青滾雜卜

臣秋濤謹案一作青滾咱卜撤

軍台之事北路郵驛本喀爾喀各部應役自用兵以來軍報絡繹需人馬頗多青滾雜卜苦之遂撤其所設台文報中斷又以額林沁多爾濟之賜死謂我喀爾喀本青吉斯汗子孫例不治罪以此散流言衆喀爾喀惑之自十六台至二

十九台一時盡撤乃以超勇親王策凌之子成
袞扎布爲定邊左副將軍往勦捕又

命尙書納延泰侍郎阿桂等往各台旋即復設達爾黨
阿等之追賊至哈薩克界阿睦爾撒納方借哈
薩克兵來拒我兵擊敗之陣獲哈薩克人楚魯
克等願說其會長阿布賚擒阿睦爾撒納來獻
阿布賚旋遣人送馬並爲阿睦爾撒納乞命達
爾黨阿不許使命往返迄數月未得賊時將冬
寒

命達爾黨阿等撤兵由北路歸與成袞扎布協擒青滾
雜卜是年冬阿桂追獲之始伏誅而西路諸降
夷巴雅爾呢噶爾藏多爾濟哈薩克錫拉等聞
青滾雜卜之變亦羣起叛亂我副都統和起殲
馬策楞玉保逮入京在途亦爲所害兆惠方駐
兵濟爾喀朗聲息阻隔或傳其率兵途次爲賊
所截者巴里坤大臣募人往探大風雪莫敢應
有守備高天喜獨請行侍衛圖倫楚巳由巴里
坤率兵往兆惠方率千有五百兵轉戰而東自

十一月起行戰於塔勒奇戰於鄂壘前後殺賊數千二十二年正月至烏魯木齊諸賊皆會自十二日至十七日數十百戰然軍中無馬皆步行雪淖中履襪亦多不完所食惟瘦駝疲馬且將盡二十三日特納格爾今阜康縣不復能衝殺乃結營固守三十日圖倫楚兵至諸賊始解圍去兆惠得圖倫楚兵又往勦巴雅爾部落始回巴里坤是歲再出師擒阿睦爾撒納並勦洗諸叛者成袞扎布出北路兆惠出西路皆於三月

中起行會諸賊自相吞噬扎納噶爾卜襲殺噶爾藏多爾濟呢嗎又欲襲扎納噶爾卜不果阿睦爾撒納自哈薩克歸會諸賊於波羅塔拉克自立爲汗我兵將至又遁去諸賊皆竄匿於是兆惠擒原任內大臣巴桑鄂博什擒原任散秩大臣厄魯錐音圖倫楚擒原任貝勒訥奇木海蘭察擒巴雅爾烏爾登擒呢嗎扎納噶爾卜已病故台吉琿齊達瓦以其首來獻惟阿睦爾撒納尙未獲夏六月兆惠富德等又窮追至哈薩

克阿布賚誓擒以獻適阿睦爾撒納率二十人
往投阿布賚約以詰朝相見先使人收其馬阿
睦爾撒納驚又逃阿布賚執其兄達什策凌送
軍門阿睦爾撒納徒步入俄羅斯爲樵者所得
守卡之瑪玉爾送往其國察罕汗處理藩院行
文俄羅斯索之阿睦爾撒納患痘死俄羅斯以
其屍送入邊兆惠富德因擇地過冬明年再盡
勦厄魯特之漏網者二十三年春兆惠由博羅
布爾噶蘇富德由賽里木如獵場中分兩翼合

圍會於伊犁凡山陬水涯可漁獵資生之地悉
搜剔不遺於是準部悉平設伊犁將軍以蒞治
之建官屯田築城開渠遂爲西北一大都會億
萬年被

聖澤於無涯云

朔方備乘卷四

拔貢張惇德初校
知縣吳壽坤覆校

朔方備乘卷第五

聖武述略五

征烏梁海述略敘

臣秋濤謹案西北部族有居國行國之殊人人能言之至同一行國而有游牧採捕之別則知之者罕今漠北之地烏梁海業採捕散處山林而受役屬於喀爾喀準噶爾諸大部蓋自古漠北之俗以游牧者為強國而捕貂打牲之人附之匈奴之興役屬丁零諸部突厥之興役屬鐵

勒諸部以古準今若合符節康熙年間喀爾喀
既內屬其所屬之烏梁海等亦皆歸順

天朝供賦聽役比於內地惟準噶爾所屬之烏梁海
部人在烏里雅蘇台之北俄羅斯之南阻深負
固未供貢役

聖祖初亦度外置之已而策妄阿拉布坦跋扈倚烏梁
海爲援始議征烏梁海以殺準部之勢厥後北
路大兵控扼要衝因以漸撫勦迨及乾隆年間
又屢征之而卡倫外之烏梁海遂全歸版籍矣

自定界以外直抵俄羅斯國別有屬彼之烏梁
海人貢貂於彼國蓋風俗同而統轄異也烏梁
海部落雖小然金山劍海之間古爲用武之地
自

天威遠震疆以戎索而卡倫以外闢地數千里所謂
無形之金湯也臣秋濤謹詳稽其事以志
聖世幅員之廣迥超前代云

征烏梁海述略

烏梁海卽明時兀良哈部族在蒙古諸部之北

而役屬於蒙古諸部大抵蒙古事游牧非平原曠野弗便也烏梁海事採捕非深山密林弗便也瀚海以外迤南近內扎薩克多平原曠野喀爾喀蒙古居之迤北近俄羅斯多深山密林烏梁海居之以故烏梁海種人與俄羅斯尤爲密邇有我

朝所屬之烏梁海歲以五貂貢於我

朝有俄羅斯所屬之烏梁海歲以五貂貢於俄羅斯其附近邊境者又有彼此各取一貂之烏梁

顯於海至雍正五年始議停止然俄羅斯仍私征一貂如故我

朝亦姑置勿問也又尼布楚城本我茂明安蒙古舊地其樹林中亦多烏梁海種人康熙二十八年議界割屬俄羅斯然此皆未嘗征所征者乃屬準噶爾之烏梁海也先是扎薩克圖汗部人根敦者世居和託輝特其地爲喀爾喀極邊西近厄魯特北近俄羅斯俗喜鬪烏梁海復錯處其間捕貂射獵依木而居納賦於和託輝特有

事則藉之爲兵故和託輝特雖隸扎薩克圖汗
實自爲一部康熙二十五年尙書阿喇尼莅監
承

制授根敦扎薩克使領其衆四十四年根敦卒以其嗣

子博貝襲扎薩克輔國公四十八年

諭曰博貝與厄魯特接壤防守不可不嚴念伊力孤必
得族中兄弟助之方克有濟納瑪琳藏布本和託輝
特人著授扎薩克一等台吉與博貝同居尋

賜牧塔斯郭勒克木克木齊克地厥後遷烏梁海人於

此因號克木克木齊克烏梁海云五十四年

上以準噶爾策妄阿喇布坦扇衆喀爾喀

命散秩大臣祁里德率大軍赴推河偵禦扎薩克博貝

從往博貝因言準噶爾不靖恃烏梁海障之乞

往招若抗卽以兵取扎薩克台吉濟納彌達阿

哩雅及根敦羅卜藏兵俱習戰請與同往

上聽其議從之此征唐努山烏梁海之始九月烏梁海

頭日和羅爾邁率屬降先是和羅爾邁居吹河

嘗以越界射獵爲博貝縛獻

上宥其罪

諭還巢至是將遣子瑚洛虎納請降博貝至因遷其游牧赴特斯冬和羅爾邁遁博貝追至喀爾罕什巴爾執之還五十九年八月大軍自阿爾台分路進勦準噶爾博貝偕朋素克喇布坦隨征西將軍祁里德由布魯勒進勦至鏗格爾河偵宰桑色布騰率眾據山守大軍分擊之降其屬二千餘並擒烏梁海逃眾四百封多羅貝勒藉準噶爾降眾賜之六十年調車臣汗兵防護烏梁

海降眾於巴顏車爾克雍正元年有厄魯特羅卜藏錫喇布者烏梁海人初隸厄魯特和託輝特貝勒博貝擒降之置汗阿林後徙置察哈爾授佐領偕藍翎侍衛春丕勒轄其屬至是攜眾叛逃土謝圖汗部扎薩克車木楚克納木扎勒偕同部扎薩克車布登車臣汗部貝勒旺扎勒偕同部輔國公車稜旺布扎薩克色稜達什等追擒之射斃賊眾阿玉什額博壘等

上嘉悅敘功晉封車木楚克納木扎勒爲多羅貝勒以

車布登父原爵貝子晉封多羅貝勒封旺扎勒
多羅郡王尋授副盟長二年正月貝勒博貝來
朝

諭廷臣曰朕詢貝勒博貝管轄烏梁海何以資生據奏
在將軍祁里德處借餉一萬八千餘兩買牲分給各
得產業今勝於昔所借項伊自以貝勒俸逐年扣抵
朕思博貝宣力戎行勲績卓著且烏梁海均朕百姓
豈有朕之百姓而借餉於朕之理所借銀兩著不必
扣還諭祁里德知之三年和羅爾邁復遁由阿哩克

竄準噶爾界博貝遣次子額琳沁由托濟邀擒
而自赴克木克木齊克緝叛黨誅之四年正月
博貝偕策凌奉

命勘阿爾台形勝初厄魯特與喀爾喀未構兵時錯處
科布多烏蘭固木地噶爾丹旣滅喀爾喀西境
直抵阿爾台故自唐努山陰之克木克木齊克
至博木等處皆博貝及來歸之厄魯特貝子策
稜旺布所屬烏梁海游牧其地至是策妄阿喇
布坦奏克木克木齊克舊隸準噶爾乞還

上弗許慮伺間掠烏梁海

詔博貝率所部兵千隨前鋒統領定壽駐唐努山陽特

斯地防護之尋

諭理藩院曰朕詳思克木克木齊克烏梁海皆博貝等所屬和羅爾邁旣已就擒交博貝撫恤居之公所但念此等人向在喀爾喀邊外林木中射獵爲生與準噶爾所屬烏梁海接壤又與俄羅斯連界宜令博貝等同大臣前往曉諭令自爲豫備以防不虞著傳諭博貝知之五年博貝率子額琳沁追擒烏梁海逃人

和羅爾邁於托濟降其衆雍正八年博貝卒康

熙年間征烏梁海之議發自博貝厥後撫輯降

衆殫竭心力而唐努山北之烏梁海遂入版圖

具以皆博貝功也乾隆七年

賜扎薩克圖汗部一等台吉額琳沁公品級

命轄烏梁海降衆十四年烏梁海降人巴黨遁有烏勒

木濟者馳告旺布多爾濟追至貢贊伯勒齊爾

盡擒還理藩院議雖擒獲究因疏懈所致停敘

功

上以旺布多爾濟聞信疾追奮勇可嘉仍

賜幣旺布多爾濟額琳沁子也尋授二等台吉十六年

三月博貝之孫青滾咱卜坐縱屬私與準噶爾

互市罪削爵

諭曰青滾咱卜縱所屬人私出汎界與準噶爾回衆貿易以致潛居烏梁海甚屬疏懈且於特諭擒解之喇嘛札木闡尙未解到怯懦推諉深負朕恩著革副將軍及扎薩克貝勒爵朕觀額琳沁人材出衆著襲扎薩克多羅貝勒但念青滾咱卜係博貝長孫一旦全

削朕心殊爲不忍著卽以額琳沁所遺公品級扎薩

克台吉職令其調補

詔額琳沁議定烏梁海出入汎界例並飭禁所部越境

與準噶爾及回衆私市十八年扎薩克圖汗部

二等台吉達什朋素克隨北路軍營參贊大臣

薩拉爾擒私入科布多汎之烏梁海人札木闡

等薩拉爾者厄魯特人初爲準噶爾宰桑乾隆

十五年準噶爾內亂薩拉爾率四十七戶投誠

授散秩大臣至是立功

高宗嘉獎之授內大臣尋

命薩拉爾收烏梁海及札哈沁眾此征阿爾泰烏梁海之始是年杜爾伯特部三車凌來歸十九年二月烏梁海人博羅特瑚圖克等擅入汎界土謝圖汗部扎薩克輔國公巴木丕勒多爾濟次子車登三丕勒隨參贊大臣薩拉爾擒之有

詔獎諭薩拉爾遂由崆格進屯卓克索招撫烏梁海青滾咱卜額琳沁等並率兵從旋追擒馮木特黨附錄札木闡等額琳沁尤奮勵薩拉爾以聞

詔封輔國公二月

諭成袞扎布日前因軍營無事額駙策凌年老就近以塔密爾作爲軍營今有辦理烏梁海之事軍營應移駐烏里雅蘇台以塔密爾作爲內地尋與尙書舒赫

德議防秋

詔來京面授方略三月以收撫烏梁海

詔桑齋多爾濟署所部副將軍偕車布登率諸部兵親隨成袞扎布駐防鄂爾海喀喇烏蘇尋偕參贊大臣安崇阿德甯等移駐庫克嶺九月青滾咱

下及土謝圖汗部扎薩克台吉三都布多爾濟
各以兵千隨參贊大臣努三等赴阿勒和碩偵
烏梁海宰桑赤倫遁吹河乃率兵由喀喇莽奈
直抵所居降其衆四百四十五戶徙所屬台吉
班札喇克察於特斯偉袞安置之薩拉爾又率
額琳沁車布登札布貢格敦丹車木楚克札布
等勦撫烏梁海宰桑達克車根等於察罕烏蘇
尋復擊宰桑禡木特及通禡木特降之十一月
敘功晉封青滾咱卜郡王品級復授所部副將

軍二十年正月烏梁海降臣察達克招包沁種
人來歸並察獲杜爾伯特所屬以獻

詔給所部敘功授察達克內大臣七月固爾班和卓等
賊衆千餘戶潛通烏梁海誘同逃大軍猝與遇
分路掩擊盡誅之先是班第之勦達瓦齊於伊
犁也道出阿爾台以烏梁海潛附準噶爾遣車
布登沿途勦捕至固爾班鼐塔克及烏蘭布拉
克喀喇哈巴地遇烏梁海副都統察達克屬得
木齊綽罕宰桑圖布慎屬得木齊喀喇曼濟等

眾盡降之並獲叛賊巴朗從賊二百餘戶師旋
車布登偕副都統敦多卜率兵三百由薩噶勒
巴什嶺往收汗烏梁海汗即烏梁海所居地也
宰桑郭爾卓輝鄂木布及布魯古特宰桑根都
什特楞古特宰桑瓜齊楞皆率眾降青滾咱卜
又招降宰桑齊巴漢等自是烏梁海地略定編
新降旗分補授總管以青滾咱卜習烏梁海情
命總轄之先是巴朗叛逃青滾咱卜追至和通鄂博率
兵還言巴朗由西路額琳哈畢爾噶遁故追不

及至是巴朗就擒青滾咱卜言盡妄

諭責之尋烏梁海逸賊戕守汛侍衛貝多爾時齊巴克
札布率兵駐防奇爾吉斯諾爾即偕根敦往捕
至察罕烏蘇遇青滾咱卜自伊犁歸與合兵赴
巴斯庫斯收撫烏梁海時舊屬準噶爾之烏梁
海散居汗哈屯等處青滾咱卜宣揚

上命於是各宰桑曰哈爾瑪什曰瑪濟岱曰納木札勒
曰保袞曰莽噶拉克曰納穆克布曰珠庫鄂木
等相繼降敘功車布登封多羅貝勒齊巴克札

布公品級九月

諭青滾咱卜率烏梁海兵隨參贊大臣哈達哈勒阿逆方大軍之勦達瓦齊也青滾咱卜與阿逆同隊交甚暱定北將軍班第與參贊大臣薩拉爾密奏阿睦爾撒納逆狀青滾咱卜微聞之私以相告阿逆既叛青滾咱卜潛遣烏梁海人諾爾布丹津赴阿逆所至是事發

諭哈達哈擒解來京未幾上追念其招撫烏梁海功

宥弗究會烏梁海賊郭勒卓輝博博等譌傳阿逆煽哈薩克阿布賚汗入寇仍

命青滾咱卜以參贊大臣隨哈達哈進勦二十一年三月以阿睦爾撒納煽烏梁海梗哈薩克道

詔札哈沁公札木禪從哈達哈勦烏梁海叛賊有固爾班和卓者奇爾吉斯宰桑也攜千餘戶潛赴烏梁海車布登札布及車登三丕勒等邀擒之因進兵哈薩克界五月達爾齊雅及納木扎勒齊蘇隴等由海喇蘭伯勒齊爾旺勦烏梁海之倡

亂者追至庫楚克及哈達什伯根斬獲甚眾大軍抵烏梁海青滾咱卜私攜所部兵還牧構逆且遣人赴烏里雅蘇台軍煽眾喀爾喀令散歸輝特逆賊普爾普德濟特等由固都爾格叛逃齊巴克札布追擒之復隨參贊大臣納穆札爾捕烏梁海逃眾至阿固特賊逸尾擊之歿於陣

事聞

諭曰齊巴克札布歿於行陣深堪嘉憫著追封輔國公賜銀三百兩治喪視一品大臣例賜祭葬入祀昭忠祠

其子巴圖濟爾噶勒襲爵並授扎薩克

詔貢楚克札布由翁吉達什和碩解內扎薩克馬納烏里雅蘇台自青滾咱卜屢干重譴

上不忍置之法

恩宥者三至是叛蹟顯著不可復追

諭廷臣曰青滾咱卜受朕恩最深去歲將軍大臣參奏阿逆伊敢私自漏洩百計趨承以致阿逆趾高氣揚肆行無忌後於追緝之時觀望退縮妄言必得兩路出師五萬方可追擒種種乖謬指不勝屈前此屢欲

擒治念伊祖博貝夙著勤勞施恩寬宥今無故自軍
營擅歸又揚言額琳沁多爾濟達木巴扎布等治罪
之後衆心疑懼而喀爾喀數年以來皆以用兵爲累
以其怨望之私託爲他人之說妄行瀆奏藐法已極
斷難姑容必當明正典刑以示懲戒著傳諭舒明阿
蘭泰如已歸游牧可諭哈達哈等旋師往勦如至舒
明所駐地方卽降旨擒解青滾咱卜之叛造僞符撤
汛兵衆扎薩克多爲所惑延丕勒多爾濟子旺
沁多爾濟等並棄汛歸牧土謝圖汗部貝勒達

什丕勒亦慮所屬游牧被掠由烏里雅蘇台軍
營私歸尋覺其詐督兵護台汛獨桑齊多爾濟
飭所屬安伍察獲台吉阿雅喇所匿僞符扎薩
克圖汗部台吉遜篤布與車臣汗部扎薩克台
吉成袞扎布亦察其詐安堵如故初遜篤布等
以檄由德沁札布所至疑與青滾咱卜通以聞
諭曰僞檄流傳或係他人假冒德沁札布之名亦未可
定著加恩免究飭令速歸舊汛接理驛務毋自貽誤
遜篤布督兵嚴守各汛誓以死拒事聞

諭曰喀爾喀王公等爲青滾咱卜所煽多擅離職守遜篤布等特一扎薩克台吉耳獨明大義不肖附逆誓死效力朕甚嘉之

賜公品級以示獎勵

詔獎桑齋多爾濟之能授北路參贊大臣

命往諭烏梁海總管赤倫協擒青滾咱卜時汗哈屯烏

梁海衆附青滾咱卜叛

詔杜爾伯特汗車凌率兵從勦自諸扎薩克棄汛後驛路中梗軍書旁午不得達經過官吏輒遇害車

木楚克札布督兵續遞文報同部三等台吉噶

瓦供給牲畜爲之護送且多捐馬助驛用諸汛

之路始通

詔晉封車木楚克札布多羅貝勒

賜噶瓦公品級

諭達什丕勒曰昨聞達什丕勒私歸游牧朕卽料其不過爲浮言所惑今果知悔悟率兵接遞驛務前咎不足深責仍加恩晉封郡王品級但驛站旣係新設非加意巡察恐有遲誤著達什丕勒會同總管達松阿

等悉心辦理七月宣

諭喀爾喀王公等曰青滾咱卜係獲罪斥革之人復加恩令襲貝勒並授副將軍去歲從征伊犁封授郡王稍有人心自當圖報孰意深負朕恩實出情理之外此次辦理烏梁海授爲參贊予以自新之路伊至烏梁海並未擒獲鄂木布郭勒卓輝等卽撤兵還雖自有哈達哈率兵往勦伊卽退還無關輕重但旣爲參贊並不奏請諭旨亦未咨報將軍率兵擅還律以軍法罪不容誅且妄造浮言煽惑衆聽其心實不可問

試思辦理準噶爾一事原爲喀爾喀經理長久之計命將興師以期一勞永逸然選派爾部官兵俱經賞給錢糧米石購辦牲畜何次不給價值而伊乃以連年用兵爲累是誠何心至軍營賞罰乃國家憲典所必行達木巴札布係管理杜爾伯特游牧之人縱令巴朗遁走諱匿不報額琳沁多爾濟監視阿逆來京明知叛蹟已著袖手旁觀致令免脫二人情罪斷無可逭然猶不忍加以顯戮令其自裁此而曲爲寬貸國法何在伊乃謂成吉思汗裔向不治罪此語舛謬

更甚如朕宗室中有犯刑章者朕又何嘗廢法耶至於稍知奮勉如巴雅爾什第桑齋多爾濟及車布登札布等則優封顯秩賜賚便蕃伊寧不聞之耶本應除其屬衆削其封爵朕始終眷念舊勲不忍遽令澌滅所有貝勒爵仍著施恩以額琳沁子輔國公旺布多爾濟承襲先是衆喀爾喀爲青滾咱卜所煽棄汎私歸或乘間肆劫青滾咱卜又分遣其黨誘厄魯特貝子朋素克公丹拜及烏梁海總管赤倫察達克等與同叛及聞

聖諭無不悔悟乞罪七月

詔旺布多爾濟就近擒獻青滾咱卜

諭曰逆賊青滾咱卜背恩叛逆所襲之爵自不應復令承襲但念此爵本係博貝所襲且效力有年不忍遽削著加恩卽令旺布多爾濟晉襲青滾咱卜所屬盡轄之會哲布尊丹巴呼圖克圖以青滾咱卜悔罪乞宥具奏

詔弗許青滾咱卜窘懼爲擁兵自衛計脅所屬曰伊克和託輝特曰巴罕和託輝特曰明噶特曰哈柳

沁曰托斯曰奢集努特六鄂拓克及烏梁海十
六鄂拓克附已大兵至皆棄去青滾咱卜攜孛
由托濟走斯吉特謀遁俄羅斯

諭旺布多爾濟爾必無與逆賊同謀之事朕可深信昨
據貝勒車布登札布屬人告稱逆賊令遷爾游牧爾
雖聽從並非有心附之今大兵已抵和託輝特爾若
能擒獻朕必加重賞否卽率屬速赴軍營旣可永受
朕恩且不墮爾祖博貝舊勲况青滾咱卜屬人不過
脅從若棄之來歸概免治罪爾其熟思審慮善自爲

計毋貽後悔十一月成衮扎布遣參贊大臣納穆札
爾輕騎往追青滾咱卜旺布多爾濟亦率兵從
至杭哈將噶斯擒青滾咱卜及其子曰車蘇隆
多爾濟曰齊旺札布巴里械送京師賊平解德
沁札布參贊大臣職十二月

諭曰親王成衮扎布奉命討罪實心效力迅奏膚功朕
甚嘉之著賞杏黃帶封伊第四子占楚布多爾濟爲
世子以獎忠勤成衮扎布奏和託輝特屬六鄂拓克
並烏梁海十六鄂拓克聞大兵至卽解尙知感

戴和託輝特輔國公旺布多爾濟係貝勒博貝
嫡嗣輔國公多爾濟車登台吉達什朋素克係
博貝從子皆未附逆請令轄青滾咱卜屬至車
登台布助逆時台吉諾爾布曾經諫沮弗聽乃
率眾台吉馳赴烏里雅蘇台軍汛訴世受

國恩誓不從賊因率屬由博羅哈卜齊爾赴察罕
托輝游牧供應駝馬亦極奮勉請授扎薩克令
轄車登台布屬庶伊等不致離析各扎薩克知
感自必嚴加鈐束

詔獎協機宜如議行二十二年正月青滾咱卜伏誅

特旨宥其幼子巴里八月車木楚克札布借唐喀祿奏
言杜爾伯特貝勒巴圖博羅特公舍稜台吉阿
喇善等通阿逆走額爾齊斯不從其汗車凌徙
牧臣等偵得狀偕副都統瑚爾起馳赴輝巴郎
山後擒巴圖博羅特並勦烏梁海賊五十戶乃
旋兵赴塔爾巴噶台緝哈薩克錫喇

諭嘉其能和衷且協機宜以

御用佩飾賜之飭敘加級九月

諭車木楚克札布偕車布登札布招降烏梁海宰桑博和勒納木札勒等車布登札布奏請遣烏梁海內大臣察達克往招之並由布延圖軍選兵策應

上聽其議於是察達克率兵四百往招車木楚克札布檄布延圖兵百繼進盡降之有特勒伯克札爾納克者阿勒坦諾爾之烏梁海宰桑也聞之亦攜屬至

詔車木楚克札布定貢賞例宣示

德意此阿爾泰諾爾烏梁海歸附之始十二月諭曰車木楚克札布數年宣力戎行勤勞懋著近復招降烏梁海善爲撫納著晉封多羅郡王二十二年先是杜爾伯特及烏梁海未內屬錯牧額爾齊斯後杜爾伯特諸台吉游牧札克拜達里克初徙牧額克阿喇勒再徙額爾齊斯烏梁海就撫以烏蘭固木地給之車凌等復請由額爾齊斯往徙遣都統納穆札爾往勘杜爾伯特及烏梁海牧界車凌復請以烏蘭固木爲屯耕地而游牧

於科布多額克阿喇勒

允之

詔嚴禁所屬勿攘竊尋以錯牧不便定烏蘭固木爲杜爾伯特牧別以科布多爲烏梁海牧車凌謀明噶特烏梁海衆叛竄哈喇哈爾榜復遣兵勦之詔酌賞從軍弁兵免追從征達瓦齊所給駝馬有察衮者車凌婿也附阿逆叛聞追軍至竄和落霍斯河爲達什所擒獻論誅宥其妻給車凌準噶爾竄黨有額爾克勝者準噶爾二十四鄂拓克之

一也既降尋叛謀竄俄羅斯有不從者二人中道脫歸至車凌所以告車凌以其一械送科布多軍以一給輝特扎薩克衮布爲導令率兵六十往勦衮布馳踰阿爾台遇賊於杭愛海圖擒斬其男俘妻女歸無脫者

獎賜茶幣二十三年春車木楚克札布奏偕察達克勘烏梁海戶口其得秦有十餘戶二十餘戶不等分置得木齊及收楞額等員請並戶少者約四十戶編得秦一

上知其悉烏梁海情

詔如所請四月烏梁海總管阿拉善攜戶百餘叛逃車木楚克札布率扎薩克圖部公多岳特追捕有車根者亦烏梁海總管也縛獻阿拉善收其眾又有烏梁海人恩克叛逃

命成衮扎布調諸部兵悉擒其屬眾並賜銀幣尋

諭扎薩克圖部公多爾濟車登偕參贊大臣福祿緝烏梁海劫賊布爾古特布格等擒之並蒙

獎賚時烏梁海賊阿木古朗等劫馬扎薩克圖部扎薩

克達什朋素克護所屬福祿劾之

詔削扎薩克留軍效力尋隨福保追擒阿木古朗等寘於法

詔宥前罪仍授扎薩克恩克等之叛竄也其屬已就擒惟恩克未獲九月車木楚克札布諜恩克竄哈屯河疏請暫歸阿勒和碩屯駐冬雪後賊必就擒

許之十二月車木楚克札布果擒恩克

賚幣是年烏梁海種人明噶特叛定邊左副將軍成衮
 扎布檄杜爾伯特扎薩克輔國公巴圖蒙克追
 勦之明噶特舊為厄魯特屬以大軍定伊犁乞
 降

詔置之黑龍江之呼倫貝爾既而由納林喀喇泥叛遁
 巴圖蒙克追之遇諸烏蘭固木河環以兵不即
 降中夜圍稍懈賊乘間逸成衮扎布劾之
 上以杜爾伯特部新附且聞檄即以兵往

詔免飭責仍量加賞賚二十四年七月車都布多爾濟
 隨杜爾伯特郡王車凌烏巴什等追勦烏梁海
 宰桑庫克辛盡降其眾

詔嘉之
 命乾清門行走先是烏梁海人郭木薩以擅殺懼罪遁
 俄羅斯車都布多爾濟追至和寧嶺縛之獻至
 是並

賚幣示獎八月
 詔賽音諾顏親王成衮扎布安置新撫烏梁海眾是時
 烏梁海以科布多產貂無多生計艱難請徙就

阿爾台山陽額爾齊斯之源採捕

上諭車凌烏巴什等曰額爾齊斯爲爾舊牧今爾移處烏蘭固木烏梁海察達克請游牧額爾齊斯地向會降旨爾等若願歸舊牧聽爾便今哈薩克已全部內附伊犁厄魯特賊衆復殲無子遺若爾果願歸舊牧可卽徙往額爾齊斯所遺烏蘭固木自可給烏梁海處之但哈薩克新附非爾等久爲內屬者比務宜嚴飭所屬安靜無事若爾部衆旣遵鈐束而哈薩克反來肆擾可卽擒誅之爾等或安土重遷則額爾齊斯

地與其爲哈薩克俄羅斯所竊據不若令烏梁海往徙之也車凌烏巴什等奏察達克所請地係烏梁海舊牧距臣等牧遠且烏蘭固木地饒水草臣等游牧久請勿徙以額爾齊斯地給烏梁海

詔如所請十二月哈薩克襲烏梁海杜爾伯特以兵三百餘擊走之得

旨獎賚二十五年烏梁海爲哈薩克部人巴圖克巴圖爾所掠賽因諾顏部公額爾克沙喇獲被掠者詰之告以烏梁海游牧遠以故被掠且哈薩克

汗阿布賚遣使至欲擒獻巴圖克巴圖爾

諭曰額爾克沙喇久駐哈薩克界可撤兵還卽以朕旨
宣諭曰劫掠烏梁海係巴圖克巴圖爾一人所爲與
其部長無涉使彼知之尋車布登札布偕車木楚克
札布擒獲巴圖克巴圖爾二十六年三月賽因
諾顏親王成袞扎布奏喀爾喀汎舊設阿爾台
今準夷回部底定向時戍區俱成內地請展札
哈沁烏梁海喀爾喀等汎資耕牧奉

詔會勘二十八年奏柰曼明安至度濟察罕布爾噶蘇

所設汎宜展至烏嚕木齊烏梁海內大臣察達
克等勘巴顏珠爾克至烏拉克沁伯勒齊爾及
烏嚕木齊可設汎十五俱相隔百里爲率軍機
大臣遵

旨議柰曼明安舊汎應遠徙但千里長途喀爾喀難遙
制應將附近烏嚕木齊之烏爾圖布拉克賽塔
喇納里特濟木薩四汎令索倫綠旗兵駐防其
蘇伯昂阿至烏拉克沁伯勒齊爾十一汎令成
袞扎布督理

詔依議既而成衮扎布來朝以督理烏梁海與哈薩克

互市協夷情

諭獎之是年烏梁海叛賊庫克辛走俄羅斯道掠哈薩
克馬土爾扈特親王車凌烏巴什率兵緝之偵
匿和羅圖郭爾馳往擊賊潰竄尾至林際獲之
斬庫克辛及從黨五十八人俘其孥及戶七十
餘歸

詔賜幣並酌賞弁兵是後烏梁海感沐

聖化永遠綏謐迄今種人之著名者有三曰唐努山烏

梁海凡四十五佐領曰阿爾泰烏梁海凡七旗
曰阿爾泰諾爾烏梁海凡二旗分隸於烏里雅
蘇台之定邊左副將軍及科布多之參贊大臣
以地在卡倫之外密邇俄羅斯禁止商民前往
貿易惟赴各城納貂之便許與民市仍禁賒借
云

朔方備乘卷五

舉人王樹枬初校
知縣吳壽坤覆校

朔方備乘卷第六

聖武述略六

哈薩克內屬述略敘

臣秋濤謹案西北之國與俄羅斯為鄰者曰哈薩克本回部之俗恃畜牧為生東接塔爾巴哈台南接伊犁二城之境賴哈薩克為屏蔽其分部大者有三曰左曰右曰北左右二部最近新疆右部之西即俄羅斯始起地也阿睦爾撒納之叛遁也實與左部相犄角及

天文進討摧朽拉枯左部旣稽首稱臣右部亦舉國內附於是膺王公台吉之爵歲時朝覲納租賦悉與內地各蒙古相等自古康居大宛之地未有服屬中國若此者也至北哈薩克一部距中國最遠雖未受職納賦然其部當俄羅斯東俄南俄之中路通莫斯科窪僅三千里程實爲俄羅斯腹心大患故常宿重兵以防之然則講北徼邊防者詎可以蘇對小國忽不加察哉敬考

高宗純皇帝神武戡定之列綴以地形山川爲哈薩克內屬述略一卷庶邊事有可稽云

哈薩克內屬述略

左部哈薩克東南與準噶爾接西與右部接北與俄羅斯接其常所會廷曰葉什勒傍葉什勒河東去塔爾巴噶台南去伊犁皆千里東南去鎮西府四千五百餘里其部曰鄂圖爾玉茲無城郭逐水草事遊牧冬夏別居無常處地廣人稠甲於他部境西北隅有獨樹一株其上五枝

盤拏蔭廣可容二百騎名鄂喀引噶克义莫朵
爲西域神物風俗物產大略與準噶爾等文字
同言語稍異其君曰汗其汗族而爲首領者名
蘇爾統相傳其地爲古大宛今詳考之蓋古康
居國也其汗阿布賚初乘達瓦齊亂數侵擾準
噶爾乾隆二十年二月準噶爾平

詔遣使往諭阿布賚言於使臣侍衛順德訥達永阿曰
向聞

大皇帝臨御中土以山川之故貢譯未通今

天威遠播掃伊犁興黃教俾與準夷俱慶昇平實無疆
之福敢以誠心歸於

德化九月順德訥等以其使博洛布拜等歸伊犁阿睦
爾撒納適以伊犁叛明年走哈薩克阿布賚納
之

詔遣將軍達爾黨阿由西路哈達哈由北路先後以大
軍進阿睦爾撒納之走哈薩克也有奈曼鄂拓
克納拉巴圖者邀劫之不獲勦其衆阿睦爾撒
納以三騎走附阿布賚其屬欲擒獻阿布賚不

可乃遣和集博爾根以兵從阿睦爾撒納走努拉自率千騎西行會於蒿哈薩拉克鄂拉下以待我師七月將軍達爾黨阿兵至於雅爾拉與和集博爾根前隊二千餘兵遇賊設伏佯敗我師登於山俯其陰則伏在焉蜂屯蟻聚隨以號火乃堅壁壘繕營伍賊不敢出越宿遣烏爾登以輕騎致師分阿里袞鄂實哈甯阿明瑞爲左右翼將軍達爾黨阿副將軍扎拉豐阿執纛以中軍進齊努渾瑪瑞特通額額爾登分部從之

賊倉猝不及顧潰於山麓斬首五百七十餘級餘敗去我兵乘勝進努拉擒楚魯克是時和集博爾根方與阿睦爾撒納引二千騎西行我軍逼之列而陣出入鏖戰良久獲其纛及礮賊乃亂斬三百四十餘級阿睦爾撒納易纛褫衣冠而遁初順德訥歸自哈薩克以阿布賚恭順狀聞復遣齋

勅往諭七月至博爾喀爾綽闊爲哈薩克兵所阻不得達至將軍哈達哈營乃遣扎薩克三都布等擊

敗阿布賚兵於蒿哈薩拉克鄂拉下斬首百餘級奪其馬匹輜重無算阿布賚遁師從之復斬首百餘獲馬二百鎗械百餘獲昭華什由是三戰皆捷師至於伊什勒於是達爾黨阿哈達哈兩軍合楚魯克昭華什既獲而見將軍極陳阿布賚之欲內附也將軍縱之俾往諭曰

大皇帝命將討叛爾從賊則死若能擒以來臣僕無二於是阿布賚亦稔知爲阿睦爾撒納所賣將擒賊以求臣於我其謀泄阿睦爾撒納乃竊哈薩

克馬十餘騎逃歸準噶爾二十二年將軍兆惠

參贊大臣富德等復將兵西征阿睦爾撒納再走哈薩克六月阿布賚以兵三萬助擒阿睦爾撒納遣其弟阿布勒比斯爲前隊與我兵遇奉將軍馬一參贊馬一陳情請罪願受約束於是兆惠等復遣使往諭阿布賚乃遣亨集噶爾等奉良馬四表請內附其文曰自臣祖額什木汗楊吉爾汗以來從未得通中國聲教今祇奉

大皇帝諭旨加恩邊末部落臣暨臣屬靡不懼忭感慕

皇仁臣阿布賚願率哈薩克全部歸於鴻化永為中國

臣僕奏入

詔受之秋阿布賚使臣至

避暑山莊朝謁

賜宴萬樹園觀燈火阿布賚既臣於我遂以其兵助擒

賊與順德訥遇於途而言曰我哈薩克以阿睦

爾撒納之故獲罪

天朝仰荷

大皇帝鴻慈不棄覆載為臣為僕願悉力擒賊庶贖前

罪毋有二心阿睦爾撒納敢外幟幟是不祥人

也是有天道其何能活乃以托忒烏珠克字印

文導我師巡行諸部是月阿布賚將以計擒阿

睦爾撒納於阿爾察圖不獲奔俄羅斯執其從

賊額布濟齊巴罕來獻先是二十一年努拉之

役和集博爾根以殘兵遁至是聞阿布賚降乃

與喀拉巴拉特者親率其屬三萬戶款於軍門

曰外臣不識文字謹以身詣降將軍兆惠為啟

帳命東向坐將軍南向坐列筵食之牲體哈薩

克俗必持咒破戒始食於是乃言爲

大皇帝臣豈敢稱禁因共飽啖畢引觀馬射懸鎖子甲射之徹其裏益大駭服約助擒賊叩首去左部咸服二十三年五月哈薩克拜濟格特部落之拜布拉克巴圖魯等獲布庫查罕六月哈薩克哈爾津等獲厄魯特和碩齊皆獻於軍械送京師二十四年阿布賚復遣其兄子俄羅斯蘇爾統及其頭目伯克訥等來朝

賜宴

高宗較射於

御園得與觀焉二十五年復遣使來朝宴之

命觀圍獵

賜勅諭俾約束所部毋越境游牧二十六年正月

賜勅諭寬所屬巴圖克巴圖爾侵掠烏梁海罪六月伴

送使臣入

覲回程定派

乾清門侍衛禁哈薩克於烏里雅蘇台市易二十

七年二月哈薩克阿布勒瑪木比特等遣使來

朝值

聖駕南巡

覲於揚州

行在

賜冠服所屬哈喇圖魯什送歸厄魯特人口賞賚有加

參贊大臣阿桂收取越界游牧之哈薩克等

諭寬其罪而還之五月弛烏里雅蘇台市易之禁仍禁

私市七月阿布賚遣使來朝

命隨觀木蘭圍

賜冠服以陪臣烏默爾為

乾清門侍衛令暫歸挈眷移居伊犁二十九年二

月阿布勒瑪木比特遣使來朝

賜冠服三十四年正月阿布勒比斯遣子卓爾齊來朝

三月阿布賚遣子幹里蘇爾統來朝三十八年

正月哈薩克波羅特繼其父阿布勒瑪木比特

為汗遣使來朝阿布賚子卓爾齊亦來朝四十

一年正月阿布賚遣使來朝俱宴賚如例哈薩

克建廷葉什勒居客斯騰城其地北極高四十

六度二十分至四十八度距京師偏西三十二度至三十七度當準噶爾北全境東西千里南北六百里四山環繞山脉亦自西而東其南境之山曰喀拉巴克喀爾海山又東爲喀爾克圖哈薩拉克山又東爲札拉圖哈薩拉克山又東爲勒克楞山踰山而南入準噶爾境齋爾界又東爲鄂綽沁吉斯山又東爲阿爾津沙拉什保台山又東北爲阿爾輝西里入準噶爾境額米爾界自喀拉巴克喀爾海山西北行折而東爲

厄勒伊們山葉什勒河源出焉又北爲尼雅克圖山又東爲尼滿哈濟蘭山又東北爲喀爾瑪奇爾哈山又東爲阿克奇拉山又東爲巴顏山又東爲蒿哈薩拉克山卽將軍哈達哈敗阿布賚處又東南爲阿巴拉爾山又東至塔爾巴噶台而止羣山內外源泉經絡其最著者爲綽多爾圖河出喀拉巴克喀爾海山東爲克巴什博爾濟爾河又東爲哈薩拉克布拉克又東爲博爾喀得克布拉克又東爲額特倫布拉克又東

北爲什納噶布拉克沮洳渚渙散燦若列星又東
爲奎蘇布拉克又東爲阿爾齊圖布拉克又東
爲青吉斯布拉克又北爲阿林布拉克又東爲
阿濟蘇布拉克又東爲烏爾圖布拉克又東北
爲色爾格河又東爲罕拉海圖布拉克又東爲
三察爾河又東爲楚庫魯克河又東南踰山入
塔爾巴噶台界其在右哈薩克西北境者爲葉
什勒河沿河西北行二百里爲哈薩克春吉索
波藍地苦寒其汗盛夏常居此自是以西地益

曠渺左部境內岡阜層沓折而西北行二千里
爲伊底克山當塔拉斯河東南境入右部右部
哈薩克東去左部二千里北至俄羅斯界西南
至塔什罕其部曰烏拉克玉茲汗曰阿比里斯
其巴圖爾有三曰吐里拜曰輝格爾德曰薩薩
克拜阿比里斯駐塔什罕城不事事受成而已
惟吐里拜實專其政其俗大略與左部等其地
在古康居國西境初阿布賚告於順德訥曰我
哈薩克之有三玉茲如準噶爾之有四衛拉特

也鄂圖爾玉茲則我爲政矣他如奇齊克玉茲
烏拉克玉茲族兄爲政當與偕來作中土臣乃
使其弟阿布勒比斯往而參贊大臣富德方以
兵索逆賊哈薩克錫拉至右部遣蒙固爾岱赫
善等往撫次軍於莽格特城外是時吐里拜等
方與塔什罕回人吐爾古戰於河上兩不相下
蒙固爾岱赫善因諭以睦鄰守土之道並宣示
聖主威德乃大感悟罷蠻觸之爭於是吐里拜等感
德畏

威詣軍門納款奉馬進表以降其文曰伏念臣者久思
內附遠處邊末與左部阿布賚各長一方爲準
噶爾阻絕末由自通近聞左部輸服被
恩優渥恭維

天使惠來祇領

宸訓得均隸臣僕誠懼誠忭謹遣臣子弟入
覲瞻仰

天顏如天覆育之

聖人在上臣願竭衰駑奮勉自効永無二心倍于左部

表聞乃受正朔列外藩焉二十三年吐里拜遣其子卓蘭及輝格爾德之弟博索爾滿朝

京師

賜宴盤山靜寄山莊並隨至

南苑與觀

天閱及燈火

恩賚甚渥今測其地北極高四十三度至四十五度距京師偏西四十五度四十八分東與左部接東南與伊犁西北境接南與布魯特及安集延那木

干諸部接西踰塔什罕西六百餘里北至依底克山接北哈薩克部界北哈薩克者以寇鈔爲俗時侵掠俄羅斯邊境俄羅斯設兵防之西南爲格根河又西南爲納穆爾河又南爲雅哈爾斯河又西南爲錫爾河又西爲薩哈斯河又北爲塔拉斯河格根河東近塔拉斯河者爲哈拉庫爾爲達布孫淖爾薩哈斯錫爾兩河之間岡巒綿亘爲穆呼札爾山爲哈拉綽克多嶺爲莽阿錫魯嶺爲柯格納斯嶺嶺北大澤名騰吉斯

周數百里蓋小海也海之東南崖有部名沙爾
 又東北薩哈斯河南有達拉什城噶拉楚克城
 錫爾河西北有波拉克城其東有那幹喀特城
 又南有蒿達克城由蒿達克西踰錫爾河為塔
 什罕其城寄居右哈薩克部內而別自為部不
 相統也

朔方備乘卷六

教諭劉淮疇初校
 知縣吳壽坤覆校

朔方備乘卷第七

考一

北徼星度考敘

臣秋濤謹案天體正圓地球之體亦渾圓周天
 三百六十度應大地七萬二千里是故論坤輿
 者必上考星度誠以憑地測天數緣理顯非如
 占驗禳祥之說多傳會亦非如考論分野之數
 有所窮也人居地而有南北則北極出地有高
 下而晝夜之長短因以不同是為南北里差人

居地而有東西則見時刻有早晚偏東一度見時應遲四分偏西一度見時應早四分是爲東西里差康熙年間

欽定皇輿全圖於直省各府州縣悉測北極高度以定緯並依

京師中線考偏東偏西之度以定經迨乾隆年間平定西域

特命推步之臣乘傳前往測量經緯度數補入全圖於是新疆回部各處星度皆可按籍而稽及奉

詔修西域圖志以晷度列爲一門而龍沙蔥雪之間準道里之遠近憑儀器之審求俯察仰觀弗踰銖黍洵可永爲後世地志諸書之槩獲茲臣纂集北徼彙編敬考

欽定皇輿全圖自喀爾喀以北直抵北海星度經緯粲然具在蓋

聖德洽乎遠邇以故夷情恭順自獻圖籍以備職方之掌聞內府有俄羅斯圖具載經緯度數

石渠天祿之藏非外臣所得窺見謹就

皇輿圖中恭錄北徼星度悉以距

京師偏東偏西之度次其遠近以昭示掌之形徼
拱極之義亦論邊事者所當知已

北徼星度考

聖祖仁皇帝聖訓曰東方朔記北方有層冰千尺冬夏
不消今年俄羅斯來朝其地去北極二十度以上名
爲冰海堅冰凝結人不能至始知東方朔所言不謬

臣秋濤謹案輿地之圖自唐以前者皆不傳於
世宋以後之圖間有傳世者亦第有開方而無

天度雖爲準望測量之法要不足爲憑也至外
藩各部及邊徼之外自古無能詳言其境者無
論圖矣惟我

聖祖於地圖一事極爲留心每

命人乘傳詣各部落詳詢精繪並

命精於推步之人測驗天度經緯或有不能身履其地
者必周諮博訪而載之既成鐫以銅版垂諸永
久乾隆乙亥平定準噶爾各部

高宗命何國宗等率西洋人分道往各部測量星度占

候節氣補入輿圖己卯諸回部悉隸版籍復

命明安圖等前往備繪地圖一如舊制蓋

皇輿圖內備載星度實由

兩朝

大聖人創制顯庸永爲典則誠自古未有之盛舉也謹

附志於此以昭架燹云

聖訓曰推算天象中國與瀚海俱在赤道四十五度之內四十五度之南水皆向南而東流四十五度之北俱向北流此皆天文地理之相合者也

臣

秋濤謹案俄羅斯自烏拉嶺以東訖於大拉

該海凡近中國邊界發源之水在外興安嶺雪
莪嶺金山以北者俱向北流入冰海蓋其緯線
皆在赤道四十五度之北也

聖訓曰中國與西洋地方俱在赤道北四十度內海洋
行船中國人多論更次西洋人多論度數自彼國南
行八十度至大狼山始復北行入廣東界嘗六閱月
在海中不見一山又自西洋至中國有陸路可通因
隔鄂羅斯諸國行人不便故皆從水路而行

臣秋濤謹案歐羅巴州緯綫自赤道北三十六度起至七十一度止經綫自

京師午綫偏西四十八度起至一百二十六度止與中國壤地相連本係一州而分爲二者歐羅巴人奉天主教似欲自爲一區以示別異也

聖祖御瀛臺召見尙書庫勒納等奏對畢庫勒納請曰黑龍江日長夜短雖晚日落不至甚暗不知何故

聖祖諭之曰黑龍江極東北之地日出日入皆近東北

方所以黑龍江地方日長夜短日落亦不甚暗

臣秋濤謹案夏至日長者冬至日必短此渾天之妙也黑龍江夏至晝六十四刻冬至晝三十二刻雅克薩汗山哈屯河唐努烏梁海夏至晝六十七刻冬至晝二十九刻此皆地方實測所及以九十六刻計者也以上黑龍江等處均與俄羅斯接界俄羅斯更在黑龍江等處之北北極出地愈高圖理琛云伊聶謝柏興晝長夜短夜亦不甚暗雖日落夜深猶可圍碁不數刻東

方已曙正與唐書骨利幹國之北晝長夜短之說相合觀於黑龍江而餘處可以類推矣
黑龍江外紀曰土人言黑龍江地處極高去天較近故夜深不甚暗壹似日在地中返照者出關東行漸遠益高所過岡阜既上輒平坦有軌途法庫門又東岡起愈平無俯瞰低下勢土人謂之上天邊子可以驗地形矣地高則天愈近測量家惟依北極高度爲準日月出輪較大色亦深赤夜見斗杓橫屋角星點亦大手若可捫

四時之氣多風四月猶霏雪霰夏日偶暄或南風作必雨不雨則江漲蓋與安嶺一帶陰山中雨雪不常或冰澌融入谿澗所致惟雷至四月始聞伏天多雹大者如盃七月已霜八月則無不雪所謂高處不勝寒可以驗天時矣臣秋濤謹案西清所記龍江風景甚詳北徼星度高至五十度以上者大抵皆然也錄之可備參考

附近北徼各處經緯度

均見會典欽天監事例

黑龍江城 北極高五十度一分偏東十度五

十八分

尼布楚城

北極高五十一度四十八分偏西

十七分

以上俱乾隆二十二年奏准

克魯倫河巴爾城

北極高四十八度六分偏

西二度五十二分

圖拉河汗山

北極高四十七度五十七分偏

西九度十二分

以上俱康熙五十二年奏准

烏里雅蘇台

北極高四十七度四十八分偏

西二十二度四十分

唐努山烏梁海

北極高五十度四十分偏西

二十四度二十分

烏蘭固木杜爾伯特

北極高四十九度二十

分偏西二十五度四十分

科布多城

北極高四十八度二分偏西二十

七度二十分

阿爾泰山烏梁海

北極高四十八度三十分

偏西二十八度三十五分

阿爾泰諾爾烏梁海

北極高五十三度二十

分偏西二十八度四十分

哈屯河 北極高五十一度十分偏西二十九

度 北極高四十八度三十分

額爾齊斯河 北極高四十八度三十五分偏

西三十二度二十五分

齋桑諾爾 北極高四十八度三十五分偏西

三十二度二十五分 以上俱乾隆三十七年奏准

哈薩克 北極高四十七度三十分偏西三十

四度五十分

塔爾巴哈台 北極高四十七度偏西三十度

以上俱乾隆三十七年奏准

巴爾噶什諾爾 北極高四十七度偏西三十

八度十分

特穆爾圖諾爾 北極高四十二度五十分偏

西三十九度二十分

吹河 北極高四十四度五十分偏西四十二

度 以上俱乾隆三十七年奏准

臣秋濤謹案以上經緯各度均係欽天監奉

旨測定凡

皇輿全圖及每歲頒行時憲書皆依以立算茲謹錄
附近北徼諸地則俄羅斯地之經緯度可以
舉隅而得矣

俄羅斯境經緯度總載

俄羅斯本境在歐邏巴州之東緯綫自赤道北
三十八度起至七十度止經綫自

京師偏西五十三度起至九十四度止其氣候南
境與北境迥異北當冬時寒冽殊甚川有堅冰

日光所不照常覺晦冥夏時溽暑逼人雲霧四
塞有晝無夜西南則天朗氣清無疾風暴雨故
其富庶之地多在西南之域

俄羅斯東藩西伯利部在亞細亞州北境緯綫
自赤道北四十五度起至七十八度止經綫自
京師偏東七十四度起至偏西五十六度止氣候
極冷冰雪凝積

俄羅斯南藩高加索部在亞細亞州西境緯綫
自赤道北四十度起至四十五度止經綫自

京師偏西六十六度起至七十九度止氣候溫和
俄羅斯屬地在亞墨利加州西北者緯綫自赤道北五十四度起至七十二度止經綫自

京師偏東七十七度起至百有三度止其地道光
五年俄羅斯始議定疆界東至英吉利屬地西
至白令海峽西南接大平洋北枕北冰海長四
千里廣三千六百里

臣秋濤謹案右俄羅斯境經緯度本之西人地理全志其經度以

京師為中綫蓋外夷而知尊

王之義者亟錄之以備攷至西人艾儒略地圖以
極西之福島為經綫第一度遞推而東至三百
六十度止又西人瑪吉士地理備考以佛郎西
國為經度中綫推偏東偏西度皆不足為訓概
從刪斥不錄謹發其凡於此

俄羅斯境各屬經緯度

京師中綫偏東各度

偏東五十分北極高六十八度五十分 惹爾

莽阿和屯

偏東一度北極高七十三度 作租和屯

偏東三度五十分北極高七十三度 郭列穆

斯歸和屯

臣秋濤謹案即疴哥德斯科一作阿谷又按此卷地名悉依內府輿圖所列惟於一統志異域錄諸書習見之地則注明以備考餘詳疆域考

偏東四度五十分北極高七十四度 德爾吉

郭列穆斯歸和屯

偏東五度北極高七十四度五十分 佳達刮

噶珊

偏東五度五十分北極高七十五度 博特錫

倭爾斯歸和屯

偏東二十三度五十分北極高六十一度五十

分

噶穆薩特喀和屯

臣秋濤謹案即岡札德加一作甘查甲

京師中綫偏西各度

偏西二度五分北極高六十八度四分 巴達

爾斯歸和屯

偏西四度二分北極高六十九度五十分 邁

歸和屯

偏西四度三十分北極高六十七度三十分

冬古爾斯歸和屯

偏西五度二十分北極高六十四度五十分

集敏噶噶珊

偏西五度五十分北極高五十八度二十分

巴爾古錫穆和屯

偏西五度五十分北極高五十七度 伊談珠

拜商

偏西五度五十分北極高五十六度二十分

烏德拜商

臣秋濤謹案
即烏的柏興

偏西六度四十分北極高六十七度三十分

列訥和屯

偏西六度四十分北極高五十一度三十分

伊拜商

偏西六度五十分北極高六十四度 鄂爾佛

拉特噶珊

偏西六度五十分北極高五十一度五十分

鄂伯爾齊都勒拜商

偏西六度五十分北極高六十九度二十分

惹鞠斯歸和屯

臣秋濤謹案即亞古德斯科

偏西六度五十分北極高五十九度五十分

格勒噶珊

偏西七度十分北極高五十六度二十分 米

德里斯克噶珊

偏西七度四十分北極高五十四度 楚庫拜

商

臣秋濤謹案即楚庫柏興

偏西七度五十分北極高六十一度十分 倭

爾郭任斯歸和屯

偏西八度二十分北極高五十九度十分 伊

爾古斯歸和屯

臣秋濤謹案即義爾古德斯科亦作額爾口城一作厄爾

庫

偏西十一度二十分北極高五十九度五十分

博拉斯歸和屯

偏西十一度五十分北極高六十一度十分

伊林斯歸和屯

偏西十一度五十分北極高六十六度五十分

希穆斯歸和屯

偏西十二度五十分北極高五十三度五十分

通肯圖拉

偏西十九度北極高六十度五十分 噶們噶

噶珊

偏西十九度三十分北極高六十一度四十分

惹尼色斯歸和屯

臣秋濤謹案卽也尼塞斯科一作伊聶謝柏興

偏西二十一度四十分北極高六十度五十分

瑪古斯歸和屯

偏西二十一度五十分北極高五十八度五十

分 阿穆哈拜商

偏西二十一度五十分北極高五十六度五十

分 烏邁圖拉

偏西二十二度二十分北極高六十度五十分

鄂羅錫金噶珊

偏西二十二度五十分北極高六十度五十分

穆納薩爾噶珊

偏西二十四度北極高六十八度十分 德羅

伊特斯郭格珠克特亨

偏西二十四度四十分北極高六十八度三十

分 多羅三色吉和屯

偏西二十四度四十分北極高六十一度二十

分 色爾日噶珊

偏西二十六度五十分北極高五十九度十分

托穆斯歸和屯

臣秋濤謹案
即痾慕斯科

偏西二十七度北極高七十四度 烏格里達

臣秋濤謹案此色楞格河
入海處海船灣泊於此

偏西二十七度三十分北極高五十八度五十

分 阿巴圖拉

偏西二十七度四十分北極高五十七度四十

分 納生斯噶珊

偏西二十七度五十分北極高五十八度二十

分 蘇斯德必噶珊

偏西二十八度五十分北極高五十八度三十

分 博蘇噶珊

偏西二十八度三十分北極高六十九度 薩

達里莽阿斯和屯

偏西二十九度二十分北極高五十八度十分

吉爾日斯噶珊

偏西二十九度五十分北極高五十九度十分

德勒尼特斯噶珊

偏西三十度四十分北極高六十一度五十分

格野斯歸和屯

偏西三十度五十分北極高五十三度三十分

僧博羅特圖拉

偏西三十度五十分北極高六十二度二十分

納隆和屯

偏西三十度五十分北極高六十二度三十分

瓦欣阿噶珊

偏西三十一度二十分北極高六十度十分

拉林斯歸和屯

偏西三十一度二十分北極高五十一度四十

分 鏗格爾圖拉

偏西三十一度五十分北極高七十七度 伊

策三布拉島

臣秋濤謹案此北海中大島俄羅斯之極北境也

偏西三十二度五十分北極高六十二度四十

分 羅納郭昂噶珊

偏西三十三度五十分北極高五十九度三十

分 巴拉彬斯歸和屯

偏西三十四度五十分北極高六十四度二十

分 蘇爾古特和屯

偏西三十五度二十分北極高六十四度十分

瑪齊木噶珊

偏西三十五度五十分北極高五十八度 伊

錫穆斯歸和屯

偏西三十六度北極高六十五度 格里穆噶

穆噶珊

偏西三十六度北極高六十四度五十分 薩

林噶珊

偏西三十六度五分北極高六十六度 郭斯

郭薩和屯

偏西三十六度五分北極高六十四度二十分

薩瑪羅特和屯

偏西三十六度二十分北極高六十七度十分

色瑪斯噶珊

偏西三十六度三十分北極高六十六度五十

分 索噶爾噶珊

偏西三十六度三十分北極高六十四度五十

分 惹底噶珊

偏西三十六度五十分北極高六十六度五十

分 訥特斯噶爾古噶珊

偏西三十六度四十分北極高六十七度十分

格倫錫甘噶珊

偏西三十六度五十分北極高六十六度十分

伯蘇噶珊

偏西三十六度五十分北極高六十八度五十

分 惹薩克吉和屯

偏西三十七度北極高六十六度十分 郭特

斯歸和屯

偏西三十七度二十分北極高六十七度五十

分 巴拉索瓦和屯

偏西三十七度二十分北極高五十八度四十

分 多拉和屯

偏西三十七度四十分北極高六十八度二十

分 羅郭衛噶珊

偏西三十七度五十分北極高六十九度 阿

布定噶珊

偏西三十七度五十分北極高六十三度三十

分 倭克噶珊

偏西三十八度北極高六十二度十分 底穆

彥斯歸和屯

臣秋濤謹案卽狄穆演斯科

偏西三十八度北極高五十八度五十分 瓦

噶噶珊

偏西三十八度三十分北極高六十三度 廿

薩穆噶珊

偏西三十八度三十分北極高五十八度二十

分 伊順斯歸和屯

偏西三十八度四十分北極高六十七度五十

分 伊斯噶爾噶珊

偏西三十八度五十分北極高五十八度五十

分 阿傅瑪克噶珊

偏西三十九度二十分北極高五十八度五十

分 瓦都歸和屯

偏西三十九度二十分北極高五十八度三十

分 多爾噶惹爾噶珊

偏西三十九度四十分北極高六十一度二十

分 惹穆尼郭傅和屯

偏西三十九度五十分北極高五十九度十分

巴拉克和屯

偏西四十度五十分北極高六十九度十分

索布色噶惹和屯

偏西四十度五十分北極高六十六度二十分

巴必努郭羅特和屯

偏西四十度五十分北極高五十九度五十分

托博爾和屯

臣秋濤謹案即托波爾一作托博勒

偏西四十二度二十分北極高六十一度二十

分 鄂達巴里噶珊

偏西四十二度五十分北極高五十六度四十

分 達爾林斯歸和屯

偏西四十三度二十分北極高五十七度五十

分 烏底多爾斯噶和屯

偏西四十三度五十分北極高六十度四十分

達傅達噶珊

偏西四十四度北極高六十二度五十分 伊

斯瑪和屯

偏西四十四度二十分北極高六十一度 郭

蘇特爾斯歸和屯

偏西四十四度二十分北極高五十三度 都

捫和屯

臣秋濤謹案即多木斯科一作圖敏

偏西四十四度三十分北極高六十五度五十

分 伯色爾斯歸和屯

偏西四十四度五十分北極高六十六度五十

分 布斯堆羅色爾歸和屯

偏西四十五度北極高七十二度 衛噶特島

臣秋濤謹案
此北海中島

偏西四十五度北極高六十一度二十分 羅

斯衛斯歸和屯

偏西四十六度十分北極高七十度五十分

色達登島

臣秋濤謹案此
北海中小島

偏西四十六度十分北極高五十六度五十分

彙衛陽斯歸和屯

偏西四十六度三十分北極高五十九度五十

分 雅班沁和屯

臣秋濤謹案
即鴉班沁城

偏西四十六度五十分北極高六十二度二十

分 古斯達雅噶珊

偏西四十七度二十分北極高六十一度五十

分 博和穆噶珊

偏西四十七度五十分北極高五十七度五十

分 烏特格和屯

偏西四十七度五十分北極高五十度三十分

塔奇和屯

偏西四十八度五十分北極高七十一度 郭

勒格惹島

臣秋濤謹案此北海中島

偏西四十八度五十分北極高七十度

多爾

格島

臣秋濤謹案此北海中小島

偏西四十八度五十分北極高六十四度二十

分 蓋郭羅特和屯

臣秋濤謹案即改郭羅多城

偏西四十八度五十分北極高六十二度五十

分 索里噶穆斯歸和屯

臣秋濤謹案即索里喀穆斯科

偏西四十八度五十分北極高六十度五十分

瓦爾郭都里雅和屯

臣秋濤謹案即費耶爾和土爾斯科

偏西四十九度二十分北極高六十三度五十

分 蘇爾頂和屯

偏西五十度四十分北極高五十四度五十分

鄂博和屯

偏西五十度三十分北極高五十九度五十分

博冷噶和屯

偏西五十度四十分北極高五十九度 巨古

爾和屯

偏西五十一度四十分北極高五十九度五十

分 鄂薩和屯

偏西五十一度四十分北極高五十六度五十

分 薩瑪拉和屯

臣秋濤謹案即西穆必爾斯科

偏西五十二度十分北極高六十度四十分

薩拉布特和屯

偏西五十二度二十分北極高六十二度五十

分 色羅博達和屯

偏西五十二度五十分北極高六十二度二十

分 赫里諾傅和屯

臣秋濤謹案即赫林諾付

偏西五十二度五十分北極高五十六度二十

分 德都爾噶珊

偏西五十二度五十分北極高五十七度二十

分 烏薩噶珊

偏西五十二度五十分北極高五十四度十分

薩拉多博和屯

臣秋濤謹案即薩拉托付一作薩拉德夫

偏西五十三度十分北極高六十一度五十分

郭勒布特和屯

偏西五十三度五十分北極高五十七度五十

分 巴達雅噶珊

偏西五十四度四十分北極高四十八度五十

分 阿噶錫和屯

偏西五十四度四十分北極高五十度五十分

錫拉哈米斯和屯

偏西五十四度四十分北極高四十九度五十

分 達里特薩拉斯和屯

偏西五十四度四十分北極高四十七度五十

分 揚噶拉和屯

偏西五十四度四十分北極高四十六度四十

分 色爾克斯和屯

偏西五十四度五十分北極高四十六度五十

分 阿斯達拉罕和屯

臣秋濤謹案即阿斯塔爾漢一作阿薩塔

干

偏西五十五度二十分北極高五十九度五十

分 來索爾和屯

偏西五十五度三十分北極高四十九度五十

分 索爾拉噶珊

偏西五十五度四十分北極高六十七度五十分
分 墨三和屯

偏西五十五度四十分北極高六十五度二十分
分 索魯歪特集岳克達和屯

偏西五十五度五十分北極高五十度五十分

伊羅法和屯

偏西五十五度五十分北極高五十七度四十分
分 德都斯和屯

偏西五十五度五十分北極高四十九度五十

分 雜里和屯

偏西五十六度北極高六十度十分 郭壘斯

和屯

偏西五十六度二十分北極高四十九度四十

分 惹爾納雜噶珊

偏西五十六度三十分北極高四十九度二十

分 薩爾噶珊

偏西五十六度四十分北極高四十九度四十

分 索啻克薩爾噶珊

偏西五十六度四十分北極高四十八度五十

分 古里克三噶珊

偏西五十六度五十分北極高五十六度三十

分 色非阿斯噶噶珊

偏西五十六度五十分北極高四十九度三十

分 巴達欣和屯

偏西五十七度三十分北極高五十七度五十

分 噶贊和屯

臣秋濤謹案卽喀山斯科一作加匱

偏西五十七度四十分北極高六十三度四十

分 倭羅克達和屯

偏西五十七度五十分北極高四十四度 得

爾集和屯

偏西五十八度北極高五十九度四十分 尼

斯納和屯

偏西五十八度十分北極高四十三度二十分

特爾奔和屯

偏西五十八度四十分北極高六十七度五十

分 必納噶和屯

偏西五十八度五十分北極高六十七度 郭

爾謨郭羅特和屯

偏西五十八度五十分北極高五十二度十分

色羅克和屯

偏西五十八度五十分北極高四十一度五十

分 沙馬吉和屯

偏西五十九度二十分北極高六十七度四十

分 阿爾甘惹爾和屯

臣秋濤謹案即亞爾
干日爾部一作亞干

日

偏西五十九度三十分北極高六十七度十分

三尼郭拉和屯

偏西五十九度三十分北極高五十九度五十

分 郭羅郭歪斯德和屯

偏西五十九度四十分北極高五十一度六十

分 畢都克和屯

偏西六十度北極高六十一度五十分 惹勒

斯拉傅和屯

偏西六十度十分北極高六十三度 羅瑪諾

傅和屯

偏西六十度十分北極高六十一度十分 郭

爾多斯瑪和屯

偏西六十度四十分北極高五十九度五十分

倭羅威謨爾和屯

偏西六十度五十分北極高四十一度五十分

額里旺和屯

偏西六十一度北極高五十七度五十分 巴

斯多傅和屯

偏西六十一度十分北極高四十八度四十分

畢斯達賴惹噶珊

偏西六十一度五十分北極高四十八度四十

分 格里博根和屯

偏西六十一度五十分北極高五十七度五十

分 密科艾和屯

偏西六十二度三十分北極高五十六度五十

分 薩特博和屯

偏西六十二度五十分北極高五十七度 噶

都穆和屯

偏西六十二度五十分北極高五十五度五十

分 丹博傅和屯

偏西六十二度三十分北極高六十六度十分

噶爾噶噶博爾占噶爾斯歸和屯

偏西六十二度四十分北極高五十七度四十

分 德拉特瑪和屯

偏西六十四度五十分北極高五十二度五十

分 郭斯羅傅和屯

偏西六十五度北極高六十一度 博勒斯拉

傅和屯

偏西六十六度三十分北極高五十七度二十

分 羅散和屯

偏西六十六度三十分北極高五十六度二十

分 勒斯科和屯

偏西六十六度四十分北極高四十五度五十

分 郭達底斯和屯

偏西六十六度四十分北極高四十八度三十

分 仄爾噶斯歸和屯

偏西六十七度五十分北極高五十八度十分

謨斯夸和屯

臣秋濤謹案即墨斯科一作莫斯科窪一作莫斯科廓瓦俄羅斯

之舊都也

偏西六十七度五十分北極高四十八度五十

分 噶蘭薩和屯

偏西六十八度三十分北極高五十三度一鄂

羅尼和屯

偏西六十八度五十分北極高五十六度五十

分 倭勒都瓦和屯

偏西六十八度五十分北極高四十五度二十

分 佛德勒必宋達噶珊

偏西六十九度北極高五十三度五十分 達

勒特斯和屯

偏西六十九度三十分北極高五十八度三十

分 巴瑪拉噶珊

偏西六十九度四十分北極高四十八度三十

分 阿索富和屯

偏西六十九度四十分北極高六十度二十分

多倭爾噶珊

偏西六十九度四十分北極高五十三度 舍

勒特斯和屯

偏西七十度北極高五十三度四十分 延噶

爾和屯

偏西七十度三十分北極高五十九度五十分

鄂羅克和屯

偏西七十度三十分北極高五十九度 謨來

斯格和屯

偏西七十度三十分北極高五十七度四十分

德爾必郭傅和屯

偏西七十度五十分北極高六十度三十分

倭斯瑪和屯

偏西七十度五十分北極高五十二度三十分

多訥特斯和屯

偏西七十一度十分北極高四十六度四十分

達捫和屯

偏西七十一度五十分北極高五十五度 德

班和屯

偏西七十一度五十分北極高五十七度三十

分 多魯薩和屯

偏西七十二度二十分北極高五十五度四十

分 都拉和屯

偏西七十二度三十分北極高五十五度二十

分 烏巴和屯

偏西七十三度二十分北極高五十五度五十

分 阿多岳傅和屯

偏西七十四度北極高五十六度五十分 古

傅噶和屯

偏西七十四度四十分北極高六十二度五十

分 色布留斯博布魯克和屯

偏西七十四度四十分北極高五十二度五十

分 澤爾訥和屯

偏西七十四度五十分北極高五十五度五十

分 噶魯噶和屯

偏西七十四度五十分北極高五十五度三十

分 博羅傳和屯

偏西七十五度三十分北極高五十九度二十

分 索謨冷斯郭和屯

臣秋濤謹案卽司馬連斯科一作斯摩速

一作斯摩
棱斯科

偏西七十五度五十分北極高六十度三十分

訥倭郭羅特和屯

偏西七十六度四十分北極高五十八度五十

分 圖古魯古傳訥和屯

偏西七十六度五十分北極高六十四度五十

分 衛布爾和屯

偏西七十六度五十分北極高五十九度二十

分 鄂爾薩和屯

偏西七十七度十分北極高四十五度三十分

喀法和屯

偏西七十七度二十分北極高四十七度三十

分 博羅歸和屯

偏西七十七度五十分北極高六十二度二十

分 散博德爾布珠克和屯

臣秋濤謹案即彼得羅堡一作

三皮提里普爾斯科俄羅斯之新都也

偏西七十七度五十分北極高五十八度二十

分 因斯拉傅和屯

偏西七十八度十分北極高六十度十分 博

勒斯古和屯

偏西七十八度二十分北極高六十二度 郭

羅穆斯多托和屯

偏西七十八度三十分北極高六十一度五十

分 若安郭羅特噶珊

偏西七十八度四十分北極高五十三度五十

分 巴圖林和屯

偏西七十九度十分北極高六十二度五十分

訥爾瓦和屯

臣秋濤謹案即里窩尼亞部與瑞典國所屬之挪耳瓦部名同

地異

偏西七十九度十分北極高五十七度五十分

斯郭羅傅噶珊

偏西七十九度五十分北極高五十二度五十

分 訥生噶珊

偏西八十度十分北極高六十度五十分 德

爾博特噶珊

偏西八十度十分北極高五十六度十分 郭

賴噶珊

偏西八十度五十分北極高五十二度五十分

博色羅和屯

偏西八十一度十分北極高五十度五十分

喀達克和屯

偏西八十一度五十分北極高五十二度 覺

傅和屯

臣秋濤謹案即幾富部一作究部一作計由斯科

偏西八十三度三十分北極高六十二度十分

多爾斯布爾噶珊

偏西八十五度三十分北極高六十二度二十

分 倭勒爾和屯

偏西八十七度三十分北極高六十一度三十

分 博爾訥和屯

偏西八十八度二十分北極高六十度四十分

薩里斯噶珊

偏西八十九度四十分北極高六十度五十分

里噶和屯

朔方備乘卷七

拔貢張惇初校
知縣勞乃宣覆校

